

Igl caschiel d'Andeer va a l'aria

Igl tschaler digl caschiel da la caschareia d'Andeer e s'amplanieu pulitameing. Mo uss âgl do lartg sen las crûnas graztga ad egn'acziun extraordinaria da la sozietad aviatica svizra.

BARTOLOME TSCHARNER/FMR

Nând separ la Veia Granda d'Andeer l'eanda passada e cun egn'ea safarmo egn camiun an measa veia gest avànt la caschareia. Quegl e atgnameing nut extraordinari. Mo vasànd igl mantùn caschiel c'igl manischiunz à cargieu liaint, âgl tutegna caztgieu d'andriescher digl signùn preschaint la destinaziun da tàntas magnucas. «Igl proxims tres mains survescha la Swiss caschiel d'Andeer a la sia cliantela», declara *Martin Bienerth*, «alura sgola igl noss 'Gourmet d'Andeer' dapartut igl mund anturn», aschunta igl signùn tut cuntaint. Dantànt e'la cargeada la savunda da tres trànschas da mintgame 50 magnucas. Var egn'ona tona caschiel vara banduno igl tschaler a la fegn. Quegl segi egn pulit surleavtg pigl manaschi, gi Bienerth a suspirànd. «Parquegl ca nus vevan ànc adigna megna blear caschiel agl tschaler an consequenza da la pandemia.» Durànt lez tains vegiani numnadameing pears diferainta cliantela, parquegl c'ustreias ad oters manaschis vegian saro las portas. «Da rafunder cliantela a da catar novs cumpraders va nut aschi tgientsch ad igl dovra tains», aschunta igl signùn cun passa 20 ons experientzga an Val Schons. Dantànt eari igl tschaler peia s'amplanieu veiadaple, a parquegl e' l'ussa satisfatg, ca la «Chäs & Co», egn'a distri-



Var 150 magnucas caschiel d'Andeer en vagnidas furnidas a la Swiss ca survescha quel segls sgols or agl mund.

FOTOS MAD

buidra da caschiel, à intermediieu la furniziun a la Swiss ca veva schon egn'eada survieu caschiel da Schons avànt radund egn'ozeni.

Augmentar igl giodimaint raquintànd igl origin

La «Chäs & Co» e egn'impurtànta canal par la vendita digl caschiel d'Andeer. Quella fatschenda e vagnida fundada igls

1983 dad *Urs Reichen* ca magna dantànt l'ustreia ad Almen. Cun la sia fatschenda veva el l'intenziun da far vanal caschiel d'òlta qualitat, produrgieu tanor las tradiziuns regiunalas a cuagl respect duevel par animals ad ambiaint. «Nus funcziunavan adigna sco intermediaders trànter las caschareias localas ad igls consumers», gi el. «An que gro ear'igl adigna noss'intenziun da «transportar» ear l'is-



La buna qualitat digl «Gourmet d'Andeer» à parschadieu igls responsabels da la proviantaziun da la Swiss ca survescha quel durànt tres mains a la sia cliantela.

torgia digls products. A Martin Bienerth à natiralmeing egn'a filosofeia tutaparti cun promover vatgas cun corna. Fagiànd egn'a relaziun persunala trànter igls produzents a la cliantela sadifranztgagn nus d'oters vandiders da caschiel. Quegl stegafescha cunfidanza a procura pigl giodimaint da consumar», gi Reichen ca colavura ànc cun las si'antierura fatschenda sco «ambassador digl caschiel».

La buna qualitat digl caschiel da Schons vegi puspe parschadieu igls cumpraders da la sozietad aviatica svizra, aschunta *Matthias Moser*, igl manader da la vendita da Chäs & Co ca porziunescha igl caschiel d'Andeer a furnescha el directameing agl eroport. Là vean el repartgieu agls aviuns, cucls quals el sgola pigl mund anturn a fa reclama pigl caschiel da Schons.

Tradiziun a plascher sen las loipas da Spleia

Sen las loipas digl Oberen Lösli a Spleia ragieva egn'atmosfera cumpetitiva la sonda passada. Igl Skiclub Tambo Spleia, l'Uniun da Sport Tumpriv ad igl Sciclub San Bernardino vevan anvido agl biatlonsprint tradiziunal.

BARTOLOME TSCHARNER/FMR

45 sportistas a sportists surtut da la regiun Viamala, da Mesoc a digl Tessin en sacatos a la partenza la sonda an damàn par samasirar an 11 diversas categoareas. Ign'era an marveglias, a tgi c'igl gartegi d'absolver igl ple dabort las duas rundas digl passlùng, tgi ca vegi igl màn pli ruassevel cun sagitar a tgi ca tutgi igl miglier la pinga rudeala nera cucls tschentg culps?

Igls unfants salegravan gea ordavànt zund fetg, parquegl ca la disizplegna digl biatlon faszinescha igls sportists giuvens la OG ca treneschan ski nordic. Igl tir da quella cursa vean acumpagnieu. Da quella maniera e'gl ear pussevel a tiraduras a tiradurs giuvens nunexperientos da far nizevlas experientzgas.

Suainter la cursa àni giudieu las atletas ad atlets la cuminànta an buna cumpagneia an l'ustreia da feasta c'e vagnida andrizada aposta an la hala da maschinas.

Victorgias per Gemperle e Fasani

La tensiun eara granda, cur ca *Stefan Mühlmann*, igl parsura digl Skiclub Tambo Spleia, à pretandieu silenzi par comunitgear la rangaziun. La victorgia digl gi à cuntanschieu *Serafino Gemperle* digl Club Amici del Bünda. El à realiso igl tains da 5 minutas 12 secundas ad à tgiutgieu tut igls 5 culps.

La ple spearta dama e stada *Alice Fasani* digls clubs giastaders da Spleia a da San Bernardino. Ella à duvro 5 minutas a 23 secundas pigl tschancùn dad 1,8 km ad à fatg nigns sbagls cun sagitar.

Las sportistas ad igls sportists alpins àn l'ocaziun da samasirar a caschùn digl slalom paralel c'è liac igls 23 da marz sen la pista a val da las pendicularas da Spleia Tambo.

La classificaziun ad ulteriuras infurmaziuns satgatan sen la pagina da sctambospluegen.ch/news.



Nina Gemperle, Amici del Bünda, a caschùn digl tir.



Las tiraduras digl biatlon agl stand da sagitar.



Igl victur digl gi Serafino Gemperle, Amici del Bünda (amiez); 2. Gian Mühlmann (san.); 3. Silvio Wieland, amadus digl Skiclub Tambo Spleia



La victura digl gi Alice Fasani segl tschancùn digl biatlonsprint.

FOTOS SCTAMBOSPLUEGEN.CH



La victura digl gi Alice Fasani, Skiclub Tambo Splügen/Sciclub San Bernardino (amiez); 2. Simona Fasani (san.); 3. Melanie Wieland, amaduas digl Skiclub Tambo Splügen